

COMUNICATO n. 3854 del 23/12/2025

Ägenump vodar Djunta di kritèrie un bia zuarzogeba di schütz. 'Z khütta dar Spinelli "A hilfe vor zen djar zo vüara di famildje vor lãnga zait un zo geba kontra dar gebortrügång". Vügelekk o a hilfe zo helva in müatar nèt zo lazza odar zo kheara afte arbat

Von djar 2026 dar näüge schèk vor daz draite khinn

[Cimbro] A strukturàl hilfe auzohalta di geborthait un an åndra garade zo helva in müatar nèt zo lazza odar zo kheara afte arbat. Dise di bichtegarsten sachandarn von näüge schèk vor daz draite khinn, a maz boda bart åhevan von earst von hoachnach 2026 un boda bart stercharn di provintziàln politike zo geba kontra dar gebortrügång un auzohalta di famildje, ågenump in setz von 19 von kristmånat vodar provintziàl Djunta.

"Bar leng untar eppaz gantz bichte vor di famildja un vor ber böllatze auzbetarn, ma vil vert makz nèt ombrómm 'z hatt nèt genumma gèlt – asó khütta dar vitzevorsitzar un provintziàl asesór vor di ekonomì, arbat un famildja, universitét un nãsäach Achille Spinelli – A hilfe boda vüart di famildje vor zen djar vor di sèlln boda adotàrn o. A näügez maz, boda schauget vürsnen un boda helft zo halta au di lentar azzase nèt learn, un darzuar helft, in an modo gantz näüge, in baibar nèt zo lazza di arbat odar åzoheva z'arbata vo näügom.

Darzuar inan vestegen toal dar schütz khint gekreschart azta di muatar kheart afte arbat odar haltet vür soi arbat. "Åhevante von drai djar von khinn – khütta no dar Spinelli – khinta vürgelekk zo geba mearar in müatar boda khearn afte arbat odar boda åhevan a näüga arbat sèlbart o. Tünante asó haltetma au pittnãdar pittar geborthait di arbat von baibar un gètt mearar vèrt in lentar o.

'Z maz

'Z maz iz augelekk vor di sèlln famildje boda hãm soìn vonsitz in di Provìntz vo Tria un boda, åhevante von earst von hoachnach 2026, izta gebortet odar izta khent adotàrt daz draite khinn. 'Z khinta vürgelekk a **vestegar toal** boda geat nã in bilãntz vodar famildja, geschètzt nã dar ICEF Famildja.

'Z khemmenda vürgelekk drai klasse:

- vor famildje pitt ICEF sin atz 0,40, dar schütz darkhennt iz 48.000 euro, auzgezalt in toaln vo 400 euro aftn månat sin balda 'z khin kompìrt di zen djar;
- vor famildje pitt ICEF obar atz 0,40 un sin atz 0,70, dar schütz darkhennt iz sin atz 30.000 euro, auzgezalt in toaln vo 250 euro aftn månat;
- vor famildje pitt ICEF obar 0,70 odar åna ICEF, khinta o zuargètt a schütz daz mearaste vo 30.000 euro, auzgezalt in toaln vo 250 euro aftn månat.

Dar vorsch vor in vestege toal von gebort schèk mocht khemmen inngètt vodar muatar vor da auz soìn di 90 tang sidar azta iz gebortet 'z khinn odar sidar az iz khent adotàrt durch di emntar von patronèt boda soìn in di lentar vodar Provìntz. Di rècht zo maga hãm in schütz mochan soìn di sèlln boma hatt balda iz gebortet odar balda iz khent adotàrt 'z khinn.

Darzuar in vestege toal mangda khemmen zuagètt **200 euro aftn månät** vor di müatar boda, åhevante von draite djar von khinn khearn afte arbat odar gian vürsnen z'arbata aulegante an arbat se sèlbart o. Disar toal darzuar bart khemmen auzgezalt in mentsch boda hatt ågevorst a bòtta aftz djar sin azta daz draite khinn kompirtr di zen djar, di muatar bart mochan zoang balse inngitt in vorsch zo haba gearbatet 'z djar pellar daz mindarste 180 tang siånka az nèt nå un nå o. Dar earst vorsch zo haba ditza gèlt in mearar bart mochan khemmen inngètt durch di patronètt boda soin in di lentar vodar Provìntz.

Baz ma mocht hãm un di bichtegarstn kritèrie

Dar schütz iz vor famildje boda hãm soin vonsitz in di Provìntz vo Tria boda von earst von hoachnach 2026 izta gebortet odar izta khent adotàrt daz draite khinn. Di bichtegarstn sachandar boma mocht hãm zo haba in schütz soinz, darzuar zo haba soin vonsitz in di Provìntz vo Tria, azta di muatar un khindar gehöarn alle dar gelaichegen famildja un azta di muatar habe sa pellar gearbatet odar azze arbat balda bortet odar balda khint adotàrt daz draite khinn, odar no, azze habe ingètt di kontribute almånko vor zbölf månät in di lestn vünf djar.

Dar schütz bart khemmen auzgezalt von provintziàl Àmt vor di hilfan un di integratìf vorsorge.

[Intervista in vitzevorsitzar Spinelli](#)

[Di pildar](#)

Übarsetzt von Schaltarle vor di zung von Toalkamou vodar Zimbar Hoachebene

(cdt)